

佛说八大菩萨经 1 卷

No. 490

佛说八大菩萨经

西天译经三藏朝散大夫试光禄卿明教大师臣法贤奉 诏译

如是我闻。一时佛在舍卫国祇树给孤独园。与大苾刍众千二百五十人俱。复有八大菩萨摩訶萨。其名曰。

妙吉祥菩萨摩訶萨。圣观自在菩萨摩訶萨。慈氏菩萨摩訶萨。虚空藏菩萨摩訶萨。普贤菩萨摩訶萨。金刚手菩萨摩訶萨。除盖障菩萨摩訶萨。地藏菩萨摩訶萨。以为上首。复有诸大菩萨摩訶萨。其名曰。

无能胜菩萨摩訶萨。龙相菩萨摩訶萨。喜意菩萨摩訶萨。无垢藏菩萨摩訶萨。无垢称菩萨摩訶萨。智王菩萨摩訶萨。无边军菩萨摩訶萨。智光菩萨摩訶萨。慧光菩萨摩訶萨。慧灯菩萨摩訶萨。智灯菩萨摩訶萨。梵授菩萨摩訶萨。天冠菩萨摩訶萨。如是等诸大菩萨。皆来会坐。

尔时世尊。告舍利弗。汝今谛听。过东方恒河沙数世界。有一佛刹名无能胜。彼土有佛。名善精进吉祥如意如来应正等觉。现为众生说微妙法。

复次舍利弗。又过东方十恒河沙世界。有一佛刹名曰无我。彼土有佛。号普照如来应供正等觉。现为众生说微妙法。

复次舍利弗。又过东方三恒河沙数世界。有一佛刹名曰善爱。彼土有佛。号吉祥如意如来应供正等觉。现为众生说微妙法。

复次舍利弗。又过东方三十四恒河沙世界。有一佛刹名寂静藏。彼土有佛。号印捺啰计覩特嚩惹王如来应供正等觉。现为众生说微妙法。

复次舍利弗。又过东方五恒河沙世界。有一佛刹名曰离尘。彼土有佛。号喜功德光自在王如来应供正等觉。现为众生说微妙法。

佛告舍利弗。若有善男子善女人等。于此经中闻是诸佛如来名号。一心谛听或自忆念。或书写读诵为他解说。彼人命终不堕恶趣。不生边地邪见诸恶律仪下贱族中。亦不生于长寿天中。亦不生于五浊恶世。饥馑疾病刀兵劫中。亦无王难水难火难贼盗虎狼等难。常生佛刹及天上人间。身相端严诸根具足。眷属圆满得宿命智。具六波罗蜜。行四无量法。通达一切甚深法藏。成最上道。佛说此经已。诸大菩萨。舍利弗及诸苾刍。天人阿修罗等。闻佛所说皆大欢喜。信受奉行。

## 佛说八大菩萨经

---

【经文信息】大正藏第 14 册 No. 0490 佛说八大菩萨经

【版本记录】CBETA 电子佛典 Rev. 1.8 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，阎学新大德输入 / 沈介盘大德校对，北美某大德提供

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】

---